

Fokus Strategi UMP menjadi universiti teknologi terunggul



Kuantan, 17 Februari- Universiti Malaysia Pahang (UMP) sedang beralih ke fasa 'Menjana Kegemilangan' yang bermula tahun ini sehingga 2020. Kegemilangan hasilnya kelak akan menjadikan universiti ini sebuah universiti teknologi terunggul dengan menyediakan pendidikan, penyelidikan dan perkhidmatan bertaraf dunia dalam ekosistem kejuruteraan dan teknologi kreatif dan inovatif yang memaksimumkan potensi insan untuk manfaat masyarakat.

Dengan menjadikan UMP sebuah universiti terunggul ianya adalah satu wawasan yang melewati kedudukan bertaraf dunia. Malah hasratnya jelas untuk UMP mampu menonjolkan dirinya berbanding universiti-universiti lain yang bertaraf dunia.

Naib Canselor UMP, Profesor dato' Dr. Daing Nasir Ibrahim berkata, lima objektif ditetapkan dalam merealisasikan hasrat ini iaitu, pertama menzahirkan graduan holistik yang relevan dengan keperluan masyarakat yang membudayakan teknologi dan keusahawanan melalui ekosistem universiti yang dinamik.

"Keduanya membina kewangan yang mampan demi kelestarian universiti dan ketiga menghasilkan penyelidikan dan inovasi yang berteraskan teknologi demi memastikan kelestarian bakat dan bidang fokus penyelidikan. Dua lagi adalah menjadi wadah kemampan pembangunan sosio-ekonomi, persekitaran dan masyarakat dan membina jenama yang menjadi pilihan masyarakat," katanya yang menyampaikan Amanat Naib Canselor di Kompleks Sukan UMP pagi ini.

Dato' Dr. Daing berkata, sebagai sebuah Universiti Awam, UMP perlu menghayati realiti dan aspirasi nasional dan pada masa yang sama, turut inovatif dan kreatif bergerak kerja dalam iklim global, skop dan sempadan autonomi yang kita miliki.

Justeru, dasar-dasar utama di peringkat nasional yang meliputi Pelan Pembangunan Pendidikan Malaysia 2015-2025 (Pendidikan Tinggi), Rancangan Malaysia Ke-11 dan Bajet 2016 turut terhitung dalam formulasi strategi, tindakan dan inisiatif di peringkat UMP bermula tahun 2016 ini.



Katanya, usaha dan respon kepada intipati Amanat Tahun Baharu 2016 oleh Yang Berhormat Menteri Pendidikan Tinggi, Dato' Seri Idris Jusoh yang bertajuk 'Pendidikan Fleksibel' pada 18 Januari yang lalu perlu turut diberikan perhatian.

Malah katanya, terdapat enam dimensi cabaran yang dikemukakan beliau untuk diteliti kita semua secara strategik iaitu pertama, ekonomi dan kewangan; kedua, Pendidikan dan Latihan Teknikal dan Vokasional (TVET); ketiga, pelajar; keempat, pensyarah; kelima, kerjasama industri-akademia-komuniti-kerajaan; dan keenam, penyelidikan.

Selain itu, dalam konteks cabaran ekonomi dan kewangan, UMP telah pun memulakan inisiatif Mygift sebagai pemacu sistem kewangan wakaf dan endowmen sepertimana yang dihasratkan oleh Menteri Pendidikan Tinggi. Begitu juga dengan cabaran Pendidikan dan Latihan Teknikal dan Vokasional (TVET) pula, UMP juga telah mengorak langkah mengembangkan potensinya dalam bidang teknologi kejuruteraan (*engineering technology*) sebagai inisiatif sokongan terhadap ekosistem TVET nasional secara berkualiti dan berinovasi.

Dalam konteks cabaran kebajikan pelajar pula, sebelum berlakunya polemik berhubung isu mahasiswa lapar baru-baru ini, UMP telah pun memulakan inisiatif-inisiatif yang memelihara kesejahteraan pelajar-pelajar yang kurang bernasib baik. Program Kongsi Rezeki, yang menawarkan set makan tengah hari kepada mahasiswa dengan harga serendah RM 1.00 semasa musim peperiksaan, iftar jamai'e dalam bulan Ramadhan, kupon makanan, pengagihan zakat dan pelbagai bantuan lain yang diusahakan Jabatan Hal Ehwal Pelajar & Alumni (JHEPA) untuk meringankan beban pelajar. Pada masa yang sama, peluang kerja sambilan dan aktiviti keusahawanan turut terbuka luas di UMP bagi membantu para mahasiswa menjana pendapatan sampingan.

Sementara itu, beliau turut mengutarakan beberapa ciri yang harus digunakan sebagai rujukan dalam usaha menjana kegemilangan iaitu inisiatif bernilai tinggi yang membawa kesan yang besar kepada pemegang taruh iaitu masyarakat. UMP juga perlu menjadi unik, istimewa atau luar biasa (tidak mudah didapati) sama ada dari aspek produk atau projek itu sendiri mahu pun business model yang ditampilkan.



Turut diberi perhatian sikap tidak mudah ditiru di mana sebarang cubaan meniru apa yang kita miliki atau lakukan hanya mengeluarkan hasil imitasi yang kurang sempurna dan tiada gantian di mana nilai tambah yang kita tawarkan tidak dapat diganti dengan produk atau perkhidmatan lain.

Dato' Dr. Daing Nasir juga mengumumkan tiga projek khusus (flagship) akan dimulakan dalam kerangka Pelan Strategik UMP 2016 - 2020 iaitu pertamanya Pendidikan teknologi ala Jerman yang mana setiap fakulti harus mempunyai sekurang-kurangnya satu program bercorak Jerman, ala Jerman atau kerjasama dengan institusi di negara Jerman.

Manakala projek kedua adalah Inovasi sosial yang merupakan gerakan usaha kerja amal kemasyarakatan dan pemindahan pengetahuan atau ilmu ke peringkat yang seterusnya. Sifatnya harus berimpak tinggi dan skop penerima manfaat yang luas. Projek Universiti Komuniti (*Community University*) adalah gerakan besar-besaran UMP untuk memasyarakatkan universiti melalui pengetahuan dan teknologi dan ketiga Pengurusan kaedah enterprais. Pengurusan prestasi (produktiviti, keberkesanan, kecekapan), pelan himpunan bakat penggantian, pengurusan risiko, ganjaran berasaskan prestasi dan sebagainya.



Majlis Amanat Naib Canselor dihadiri lebih 5000 warga universiti. Hadir sama Timbalan Naib Canselor (Akademik dan Antarabangsa), Prof. Dato' Dr. Rosli Mohd. Yunus, Timbalan Naib Canselor (Penyelidikan dan Inovasi), Prof. Dr. Mashitah Mohd. Yusoff, Timbalan Naib Canselor (Hal Ehwal Pelajar dan Alumni), Prof. Dato' Dr. Yuserrie Zainuddin dan Yang Dipertua Majlis Perwakilan Pelajar, Madyasir Ahmad Basir.

Majlis juga diserikan dengan sambutan ulang tahun Universiti Malaysia Pahang yang ke-14 dengan acara memotong kek beramai-ramai diketuai Naib Canselor serta diiringi nyanyian kumpulan koir.

Disediakan Unit Perhubungan Awam, Bahagian Komunikasi Korporat PNC